

PEMBERITAHUAN PERTANYAAN

DEWAN RAKYAT, MALAYSIA

PERTANYAAN : LISAN
DARIPADA : YB. DR. AZMAN B. ISMAIL (KUALA KEDAH)
TARIKH : 21 NOVEMBER 2016 (ISNIN)
NO. SOALAN : 16

SOALAN

YB. DR. AZMAN B. ISMAIL (KUALA KEDAH) minta **MENTERI PERDAGANGAN ANTARABANGSA DAN INDUSTRI** menyatakan sama ada benar Syarikat Antarabangsa Seagate memindahkan operasinya daripada Malaysia pada tahun ini kerana faktor kenaikan kos berkaitan GST.

JAWAPAN

Tuan Yang DiPertua,

Ingin dijelaskan bahawa syarikat Seagate merupakan sebuah syarikat multinasional yang telah beroperasi di Malaysia sejak tahun 1988. Syarikat tersebut mempunyai tiga (3) fasiliti pengilangan yang terletak di Pulau Pinang, Johor dan Negeri Sembilan bagi pengeluaran komponen elektrik dan elektronik.

Pihak Seagate di Malaysia akan memberhentikan operasi pengeluaran *hard disk drives* (HDD), dengan izin, untuk aplikasi pengguna yang akan melibatkan penutupan kilang-kilang syarikat di Pulau Pinang dan Negeri Sembilan sebelum akhir tahun 2017. Penutupan ini didorong oleh faktor *disruptive technology*, dengan izin, dalam industri penstoran data serta peralihan teknologi dari HDD kepada *solid state drives* (SSD), dengan izin, bukanlah disebabkan oleh kenaikan kos berkaitan Cukai Perkhidmatan dan Barangan (GST).

Untuk makluman Ahli Yang Berhormat,

Disruptive technology, dengan izin, dalam industri penstoran data, adalah evolusi digital di peringkat global yang telah menjejaskan permintaan komputer, termasuk komputer riba yang dilengkapi dengan sistem penstoran HDD. Ini adalah berikutan trend semasa pengguna yang kini cenderung kepada penggunaan komputer riba, telefon pintar dan *tablet*, dengan izin, yang dilengkapi dengan sistem penstoran *solid state drives* (SSD), dengan izin. Kos per gigabait bagi SSD telah menurun lebih dari 60% dalam tempoh 4 tahun yang lepas dan dijangka terus menurun sebanyak 22% pada tahun 2017. Ini dijangka terus menjejaskan pasaran HDD.

Secara teknikalnya, sistem pengoperasian SSD adalah lebih pantas dan efisien dari segi *high reliability and durability*, dengan izin. Di samping itu, harga SSD dengan kapasiti yang lebih besar adalah lebih kompetitif berbanding HDD. Selain itu, aplikasi bagi keluaran SSD adalah lebih meluas berbanding HDD khususnya dalam penggunaan peranti mudah alih.

Berdasarkan kepada kedudukan semasa pasaran global, tahap permintaan HDD telah menurun sejak tahun 2014 ekoran penurunan tahap permintaan bagi komputer, termasuk komputer riba yang dilengkapi dengan HDD.

Sehubungan dengan itu, pihak Seagate memutuskan untuk memberhentikan operasi pengeluaran HDD di Malaysia sebagai langkah penstrukturan semula operasi global kumpulan Seagate.

Pihak Seagate juga akan terus mengekalkan operasinya di Johor bagi pengeluaran *substrates*, *IT Shared Resources Center*, dan *Human Resources Call Center for Asia Pacific*, dengan izin di Pulau Pinang serta aktiviti penyelidikan dan pembangunan (R&D) di Negeri Sembilan.